

七十二家集

沈隱侯集卷之十一

梁吳興沈約休文著

明閩漳張爕紹和纂

論

七賢論

嵇生是上智之人值無妄之日神才高傑故爲  
世道所莫容風邈挺特蔭映於天下言理吐論  
一時所莫能參屬馬氏執國欲以智計傾皇祚  
誅鉏勝已靡或有遺玄伯太初之徒並出嵇生

之流咸已就戮稽審於此時非自免之運若登  
朝進仕映邁當時則受禍之速過於旋踵自非  
霓裳羽帶無用自全故始以餌木黃精終於假  
塗託化阮公才器宏廣亦非衰世所容但容貌  
風神不及叔夜求免世難如爲有塗若率其恒  
儀同物俯仰邁羣獨秀亦不爲二馬所安故毀  
行廢禮以穢其德崎嶇人世僅然後全仲容年  
齒不~~繼~~不懸風力鑪可慕李文風尙景而行之  
彼嵇阮二生志存保已旣託其迹宜慢其形慢

形之具非酒莫可故引滿終日陶瓦盡年酒之  
爲用非可獨酌宜須用侶然後成歡劉伶酒性  
旣深子期又是飲客山王二公悅風而至相與  
莫逆把臂高林徒得其遊故於野澤衡杯舉樽  
之致寰中妙趣固冥然不睹矣自嵇阮之外山  
向五人止是風流器度不爲世匠所駭且人本  
合情情性宜有所託慰悅當年蕭散懷抱非五  
人之與其誰與哉

辯聖論

聖人蓋人中之含明德盡照精粹凝玄者或三  
聖並時或千載寂蔑聖人遺情忘已常以兼濟  
爲念若不登九五之位則其道不行非以黃屋  
玉璽爲尊貴也文王造周而未集武王集之而  
未成周公雖無王錄而父兄二聖之烈不可以  
不終若非表以聖功制禮作樂則太平之基不  
著二聖之美不彰孔子當無錄之運值自晦之  
時而云河不出圖洛不出書吾已矣夫欲以聖

德示天下垂來世當仲尼在世之時世人不言  
爲聖人也伐樹削迹于七十君而不一值或以  
爲東家丘或以爲喪家犬若不高嘆鳳鳥稱  
周公樂正雅頌各得其所則當世安知其聖人  
乎

均聖論

自天地權輿民生攸始邈哉眇邈無得而言焉  
無得而言因有可言之象至於太虛之空曠無  
始之杳茫豈唯言象莫窺良以心慮事絕及天  
地叢穢來宅其中毫端之泛巨海方斯非譬然  
則有此天地已來猶一念也我之所久莫過軒  
羲而天地之在彼太虛猶軒羲之在彼天地齟  
齬之徒唯謂赫胥爲遠何其瑣瑣爲念之局邪  
世之有佛莫知其始前佛後佛其道不異法身

湛然各存應感感之所召跨大千而咫尺緣苟  
未應雖踐跡而弗覩娑婆南界是曰閻浮葱嶺  
以西經塗密邇緣運未開自與理隔何以言之  
夏殷已前書傳簡寡周室受命經典備存象寄  
狄韞隨方受職重譯入貢總括要荒而八蠻五  
狄莫不愚鄙文字靡識訓義不通咸納贄王府  
登樂清廟西國密塗厥路非遠雖葉書橫字華  
梵不同而深義妙理於焉自出唐虞三代不容  
未有事獨西限道未東流豈非區區中國緣應



未啓求其會歸尋其肯要寧與四夷之樂同日  
而語乎非爲姬公所遺蓋由斯法宜隱故也炎  
昊之世未火未粒肉食皮衣仁惻之事弗萌懷  
抱非肉非皮死亡立至雖復大聖殷勤思存救  
免而身命是資理難頓奪寔宜導之以漸稍啓  
其源故燧人火化變腥爲熟腥熟旣變蓋佛教  
之萌兆也何者變腥爲熟其事漸難積此漸難  
可以成著迄乎神農復垂汲引嘉穀肇播民用  
粒食歉腹克虛非肉可飽則全命減殺於事彌

多自此已降矜護日廣春蒐免其懷孕夏苗取其害穀秋獮冬狩所害誠多頓去之難已備前說周孔二聖宗條稍廣見其生不忍其死聞其聲不食其肉草木斬伐有時麋卵不得妄犯漁不竭澤畋不燎原釣而不綱弋不射宿肉食蠶衣皆須耆齒牛羊犬豕無故不殺此則戒有五支又開其一也逮于酣營于酒滯迷乎色詭妄於人攘濫自已外典所禁無待釋教四者犯人爲含靈之首一者害獸獸爲生品之末上聖

開宗宜有次第亦由佛戒殺人爲業最重也內  
聖外聖義均理一而蔽理之徒封著外教以爲  
烹羊豢豕理固宜然惑者又云若如釋氏之書  
咸有緣報之業則禹湯文武並受封剏周公孔  
子俱入鼎鑊是何迷於見道若斯之篤耶試尋  
斯證可以有悟矣

陶弘景難沈鎮軍均聖論附

山民陶隱居仰諮論云前佛後佛其道不異  
周室受命象寄狄韞隨方受職西國密塗厥

路非遠唐虞三代不容未有事獨西限道未  
東流非爲姬公所遺蓋由斯法宜隱燧人火  
粒變生爲熟蓋佛教之萌兆周孔二聖宗條  
稍廣見生不忍其死聞聲不食其肉草木斬  
伐有時麋卵不得妄犯又戒有五支四者犯  
人人爲含靈之首一者害獸獸爲生品之末  
內聖外聖義均理一咨曰謹按佛經一佛之  
興動踰累劫未審前佛後佛相去宜幾釋迦  
之現近在莊王唐虞夏殷何必已有周公不

言恐由未出非關宜隱育王造塔始敬王之  
世旣間浮有四則東國不容都寡夫子以華  
禮興教何宜乃說夷法故歎中國失禮求之  
四夷亦良有別意且四夷之樂裁出要荒之  
際投諸四裔亦密邇危羽之野禹跡所至不  
及河源越裳白雉尙稱重譯則天竺罽賓久  
與上國殊絕衰周以後時或有聞故鄒子以  
爲赤縣於宇內止是九州中之一耳漢初長  
安乃有浮屠而經像眇昧張騫雖將命大夏

甘英遠屈安息猶不能宣譯風教闡揚斯法  
必其發夢帝庭乃稍就興顯此則似如時致  
通闕非關運有起伏也若必以緣應有會則  
昔之淳厚羣生何辜今之澆薄羣生何幸假  
使斯法本以救濟者夫爲罪莫過於殺肉食  
之時殺孰甚焉而方俟火粒甫爲教萌於大  
慈神力不有所躋乎若觀糧未播殺事難以  
息未審前時過去諸佛復以何法爲教此教  
之萌起在何佛兼四戒犯人爲報乍輕一殺

豈獸受對更重首輕末重亦爲未達夫立人之道曰仁與義周孔所云聞聲不食斬伐有時者蓋大明仁義之道於鳥獸草木尙曰其然況在人乎而可悖虐非謂內惕寡方意在緣報覩迹或似論情顧垂不審於內外兩聖其事可得是均已不此中參差難用頓悟謹備以諮洗願具啓諸蔽

荅陶華陽

難云釋迦之現近在莊王唐虞夏殷何必已有  
周公不言恐由未出非關宜隱育王造塔始敬  
王之世間浮有四則東國不容都無荅曰釋迦  
出世年月不可得知佛經既無年曆注記此法  
又未東流何以得知是周莊之時不過以春秋  
魯莊七年四月辛卯恒星不見爲據三代年既  
不同不知外國用何曆法何因知魯莊之四月  
是外國之四月乎若外國用周正耶則四月辛



卯長曆推是五日了非八日若用殷正耶周之  
四月殷之三月用夏正耶周之四月夏之二月  
都不與佛家四月八日同也若以魯之四月爲  
證則日月參差不可爲定若不以此爲證則佛  
生年月無證可尋且釋迦初誕唯空中自明不  
云星辰不見也瑞相又有日月星辰停住不行  
又云明星出時墮地行七步初無星辰不現之  
語與春秋恒星不現意趣永乖若育王造塔是  
敬王之世閭浮有四此道已流東國者敬王已

至於六國記注繁密曾無一槩育王立塔非  
敬王之時又分明也以此而推則釋迦之興不  
容在近周世公旦之情何得未有

難云夫子自以華禮興教何宜乃說夷法故歎  
中國失禮求之四夷亦良有別意荅曰弘教次  
第前論已詳不復重辯

難云四夷之樂裁出要荒之際投諸四裔亦密  
邇危羽之野禹跡所至不及河源越裳白雉尙  
稱重譯則天竺屬賓久與上國殊絕衰周已後

時或有聞故鄒子以爲赤縣於宇內止是九州  
中之一耳漢初長安乃有浮圖而經像眇昧張  
騫雖將命大夏甘英遠屆安息猶弗能宣譯風  
教必其發夢帝庭乃稍興顯此則似時有通礙  
非關運有起伏也荅曰本以西域路近而大法  
不被此蓋由緣應未發非謂其途爲遠也其路  
旣近而此法永不東流若非緣應未至何以致  
此及後東被皆由緣應宜發通礙各有其時前  
論已盡也

難曰若必以緣應有會則昔之淳厚羣生何辜  
今之澆薄羣生何幸假使斯法本以救澆者夫  
爲罪莫過於殺肉食之時殺孰甚焉而方俟火  
粒甫爲教萌於大慈神力不有所躡乎若杭糧  
未播殺事難息未審前時過去諸佛復以何法  
爲教此教之萌起在何佛兼四戒犯人爲報乍  
輕一殺害獸受對更重首輕末重亦爲未達夫  
立人之道曰仁與義周孔所云聞聲不食斬伐  
以時者蓋欲大明仁義之道于鳥獸草木尚曰

其然況在乎人而可悖虐非謂內暢寡方意在緣報覩迹或似論情顧垂不審於內外兩聖其事可得是均以不此中參差難用頓悟謹備以諮洗願具啓諸蔽荅曰民資肉食而火粒未啓便令不肉教豈得行前論言之已具不復重釋衆生緣果所遭各有期會當昔佛教未被是其惡業盛時後之聞法是其善業萌時善惡各有其時何關淳厚之與澆薄五支之戒各有輕重非殺戒偏重四支並輕且五業雖異而互相發

起犯人之戒人重故先出犯獸之戒獸輕故後  
被訓戒之道次第宜然周公孔子漸弘仁惻而  
論已詳請息重辨若必以釋教垂方域之理外  
此自一家之學所不敢言

究竟慈悲論

釋氏之教義本慈悲慈悲之要全生爲重恕已  
固心以身觀物欲使抱識懷知之類愛生忌死  
之羣各遂厥宜得無遺失而俗迷日久淪惑難  
變革之一朝則疑怪莫啓設教立方每由漸致  
又以情嗜所深甘腴爲甚嗜深於情尤難頓革  
是故開設三淨用伸權道及涅槃後說立言將  
謝則大明隱惻貽厥將來夫肉食蠶衣爲方未  
異害命天生事均理一淪爾爛蛾非可忍之痛

懸庖登俎豈偏重之業而去取異情開抑殊典  
尋波討源良有未達漁人獻鮓肉食同有其緣  
臬妾登絲蠶衣共頒其分假手之義未殊通閉  
之詳莫辨訪理求宗未知所適外典云五畝之  
宅樹之以桑則五十者可以衣帛矣雞豚犬彘  
勿失其時則七十者可以食肉矣然則五十九  
年已前所衣宜布矣六十九年已前所食宜蔬  
矣輕煖於身事既難遣甘滋於口又非易忘對  
而爲言非有優劣宜臬麻果菜事等義同懷寒



實腹曾無一異偏通繒纈當有別途請試言之  
夫聖道隆深非思不洽仁被羣生理無偏漏拯  
羸去甚教義斯急繒衣肉食非已則通及晚說  
大典弘宣妙訓禁肉之旨載現于言黜繒之義  
斷可知矣而禁淨之始猶通蠶葦蓋是敷說之  
儀各有次第亦猶闡提二義俱在一經兩說參  
差各隨教立若執前迷後則闡提無入善之途  
禁淨通蠶則舍生無頓免之望難者又以闡提  
入道聞之後說蠶葦宜禁曾無槩理大聖弘旨

義豈徒然夫常住密奧傳譯遐阻泥洹始度咸  
謂已窮中出河西方知未盡關中晚說厥義彌  
暢仰尋條流理非備足又案涅槃初說阿闍世  
王大迦葉阿難三部徒衆獨不來至旣而二人  
並來唯無迦葉迦葉佛大弟子不容不至而經  
無至文理非備盡昔涅槃未啓十數年間廬阜  
名僧已有蔬食者矣豈非乘心闇踐自與理合  
者哉且一朝裂帛可以終年永牢待膳亘時引  
日然則一歲八蠶已驚其驟終朝未肉盡室驚

嗟拯危濟苦先其所急敷說次序義實在斯外  
聖又云一人不耕必有受其饑者故一人躬稼  
亦有受其飽焉桑野漁川事雖非已炮肉裂繒  
咸受其分自涅槃東度三肉罷緣服膺至訓操  
槩彌遠促命有殫長蔬靡憚秋禽夏卵比之如  
浮雲山毛海錯事同於腐鼠而繭衣纈服曾不  
懷疑此蓋慮窮於文字思迷於弘旨通方深信  
之客庶有鑒於斯理斯理一悟行迷克反斷蠶  
肉之因固蔬臬之業然則舍生之類幾於免矣

# 形神論

凡人一念之時七尺不復關所念之地凡人一念聖人則無念不盡聖人無已七尺本自若空以若空之七尺總無不盡之萬念故能與凡夫異也凡人一念忘彼七尺之時則身廢於視足廢於踐當其忘目忘足與夫無目無足亦何異哉凡人之暫無本實有無未轉瞬有已隨之念與形乖則暫忘念與心謝則復合念在七尺之一處則他處與異人同則與非我不異但凡人

之暫無其無其無甚促聖人長無其無其無甚  
遠凡之與聖其路本同一念而暫忘則是凡品  
萬念而都忘則是大聖以此爲言則形禪幾乎  
惑人疑因果相主毫分不爽美惡之來皆有定  
業而六度所脩咸資力致若脩此力致復有前  
因因熟果成自相感召則力致之功不復得立  
六度所脩幾於廢矣釋迦邁九劫勇猛所成勇  
猛之因定於無始本不資九安得稱劫余以爲  
因果情照本是二物先有情照却有因果情照

既動而因果隨之未有情照因果何託因識二  
塗用合本異其本既異厥體不同情照別起於  
理非礙六度九劫差不足疑也

沈隱侯集卷之十二

梁吳興沈約休文著

明閩漳張爕紹和纂

論

神不滅論

含生之類識鑒相懸等級參差千累萬沓昆蟲  
則不逮飛禽飛禽則不逮犬馬曷明昭著不得  
謂之不然人品以上賢愚殊性不相窺涉不相  
曉解燕比越南未足云匹其愚者則不辨菽麥

悖者則不知愛敬自斯已上性識漸弘班固九  
品曾未槩其萬一何者賢之與愚蓋由知與不  
知也愚者所知則少賢者所知則多而萬物交  
加羣方緬曠情性曉昧理趣深玄由其塗求其  
理既有曉昧之異遂成高下之差自此相傾品  
級彌峻窮其原本盡其宗極互相推仰應有所  
窮其路既窮無微不盡又不得謂不然也且五  
情各有分域耳目各有司存心運則形忘目用  
則耳廢何則情靈淺弱心慮雜擾一念而兼無



由可至旣不能兼紛糾遞襲一念未成他端互起互起衆端復同前矣不相兼之由由於淺惑惑淺爲病病於滯有不淺不惑出於兼忘以此兼忘得此兼照始自凡夫至于正覺始惑於不惑不兼至能兼又謂不然也又昆蟲天促含靈靡二或朝生夕殞或不識春秋自斯而進脩短不一旣有其短豈得無長虛用損年善攝增壽善而又善焉得無之又不得謂之不然也生旣可夭則壽可無夭旣無矣則生不可極形神之

別斯旣然矣形旣可養神寧獨異神妙形麤較  
然有辨養形可至不朽養神安得有窮養神不  
窮不生不滅始末相較豈無其人自凡及聖含  
靈義等但事有精麤故人有凡聖聖旣長存在  
凡獨滅本同末異義不經通大聖貽訓豈欺我  
哉

難范縝神滅論

來論云形卽是神神卽是形又云人體是一故  
神不得二若如雅論此二物不得相離則七竅  
百體無處非神矣七竅之區既具百體所營不  
一神亦隨事而應則其名亦應隨事而改神者  
對形之名而形中之形各有其居則應神中之  
神亦應各有其名矣今舉形則有四肢百體之  
異屈伸聽受之別各有其名各有其用言神唯  
有一名而用分百體此深所未了也若形與神

對片不可差何則形之名多神之名寡也若如  
來論七尺之神神則無處非形形則無處非神  
矣刀則唯刃猶利非刃則不受利名故刀是舉  
體之稱利是一處之目刀之與利既不同矣形  
之與神豈可妄合耶又昔日之刀今鑄爲劍劍  
利卽是刀利而刀形非劍形於利之用弗改而  
質之形已移與夫前生爲甲後生爲丙夫人之  
道或異往識之神猶傳與夫劍之爲刀刀之爲  
劍有何異哉又一刀之質分爲二刀形已分矣

而各有其利今取一牛之身而剖之爲兩則飲  
醢之生卽謝任重之用不分又何以刀之爲  
利譬形之與神耶來論謂刀之與利卽形之有  
神刀則舉體是一利形則舉體是一神神用於  
體則有耳目手足之別手之用不爲足用耳之  
用不爲眼用而利之爲用無所不可亦可斷蛟  
虵亦可截鴻鴈非一處偏可割東陵之瓜一處  
偏可割南山之竹若謂利之爲用亦可得分則  
是可以執物眼可以聽聲矣若謂刀背亦有利

兩邊亦有利但未鍛而銛之耳利若遍施四方則利體無處復立形方形直並不得施利利之爲用正存一邊毫毛處耳神之與形舉體若合又安得同乎刀若舉體是利神用隨體則分若使刀之與利其理若一則胛下亦可安眼背上亦可施鼻可乎不可也若以此譬爲盡耶則不盡若謂本不盡耶則不可以爲譬也若形卽是神神卽是形二者相資理無偏謝則神亡之月形亦應消而今有知之神亡無知之形在此則

神本非形形本非神又不可得強令如一也若  
謂總百體之質謂之形總百體之用謂之神今  
百體各有其分則眼是眼形耳是耳形眼形非  
耳形耳形非眼形則神亦隨百體而分則眼有  
眼神耳有耳神耳神非眼神眼神非耳神也而  
偏枯之體其半已謝已謝之半事同木石譬彼  
僵尸永年不朽此半同滅半神既滅半體猶存  
形神俱謝彌所駭惕若夫二負之尸經億載而  
不毀單開之體尙餘質於羅浮神形若合則此

二士不應神滅而形存也來論又云歟而生者歟而滅者漸而生者漸而滅者請借子之衝以攻子之城漸而滅謂死者之形骸始乎無知而至于朽爛也若然則形之與神本爲一物形旣病矣神亦告病形旣謝矣神亦云謝漸之爲用應與形俱形以始亡未朽爲漸神獨不得以始末爲漸耶來論又云生者之形骸變爲死者之骨骼案如來論生之神明生之形骸旣化爲骨骼矣則生之神明獨不隨形而化乎若附形而



化則應與形同體若形骸卽是骨骼則死之神  
則不得與生之神明矣向所謂死定自未死也  
若形骸非骨骼則生神化爲死神生神化爲死  
神卽是三世安謂其不滅哉神若隨形形旣無  
知矣形旣無知神本無質無知便是神亡神亡  
而形在又不經通若形雖無知神尙有知形神  
旣不得異則向之死形翻復非枯木矣

范縝神滅論附

或問予云神滅何以知其滅也荅曰神卽形

也形卽神也是以形存則神存形謝則神滅也問曰形者無知之稱神者有知之名知與無知卽事有異神之與形理不容一形神相卽非所聞也荅曰形者神之質神者形之用是則形稱其質神言其用形之與神不得相異也問曰神故非用不得爲異其義安在荅曰名殊而體一也問曰名旣已殊體何得一荅曰神之於質猶利之於刀形之於用猶刀之於利利之名非刀也刀之名非利也然而

捨利無刀捨刀無利未聞刀沒而利存豈容  
形亡而神在問曰刀之與利或如來說形之  
與神其義不然何以言之木之質無知也人  
之質有知也人既有如木之質而有異木之  
知豈非木有一人有二邪答曰異哉言乎人  
若有如木之質以爲形又有異木之知以爲  
神則可如來論也今人之質實有知也木之  
質實無知也人之質非木質也木之質非人  
質也安有如木之質而復有異木之知哉問

曰人之質所以異木質者以其有知耳人而無知與木何異荅曰人無無知之質猶木無有知之形問曰死者之形骸豈非無知之質邪荅曰是無人質問曰若然者人果有如木之質而有異木之知矣荅曰死者如木而無異木之知生者有異木之知而無如木之質也問曰死者之骨骼非生之形骸邪荅曰生形之非死形死形之非生形區已革矣安有生人之形骸而有死人之骨骼哉問曰若生

者之形骸非死者之骨骼非死者之骨骼則  
應不由生者之形骸不由生者之形骸則此  
骨骼從何而至此邪荅曰是生者之形骸變  
爲死者之骨骼也問曰生者之形骸雖變爲  
死者之骨骼豈不從生而有死則知死體猶  
生體也荅曰如因榮木變爲枯木枯木之質  
寧是榮木之體問曰榮體變爲枯體枯體卽  
是榮體絲體變爲縷體縷體卽是絲體有何  
別焉荅曰若枯卽是榮榮卽是枯應榮時凋

零枯時結實也又榮木不應變爲枯木以榮  
卽枯無所復變也榮枯是一何不先枯後榮  
要先榮後枯何也絲縷之義亦同此破問曰  
生形之謝便應豁然都盡何故方愛死形綿  
歷未已邪荅曰生滅之體要有其次故也夫  
歟而生者必歟而滅漸而生者必漸而滅歟  
而生者飄驟是也漸而生者動植是也有歟  
有漸物之理也問曰形卽是神者手等亦是  
邪荅曰皆是神之分也問曰若皆是神之分

神既能慮手等亦應能慮也荅曰手等亦應能有痛癢之知而無是非之慮問曰慮爲一爲異荅曰知卽是慮淺則爲知深則爲慮問曰若爾應有二乎荅曰人體惟一神何得二問曰若不得二安有痛癢之知復有是非之慮荅曰如手足雖異總爲一人是非痛癢雖復有異亦總爲一神矣問曰是非之慮不關手足當關何處荅曰是非之意心器所主問曰心器是五藏之心非邪荅曰是也問曰五

藏有何殊別而心獨有是非之慮乎荅曰七竅亦復何殊而司用不均問曰慮思無方向以知是心器所主荅曰五藏各有所司無有能慮者是以心爲慮本問曰何不寄在眼等分申荅曰若慮可寄於眼分何故不寄於耳分邪問曰慮體無本故可寄之於眼分眼目有本不假寄於他分也荅曰眼何故有本而慮無本苟無本於我形而可偏寄於異地亦可張甲之情寄王乙之軀李丙之性託趙丁



之體然乎哉不然也問曰聖人形猶凡人之  
形而有凡聖之殊故知形神異矣荅曰不然  
金之精者能昭穢者不能昭有能昭之精金  
寧有不昭之穢質又豈有聖人之神而寄凡  
人之器亦無凡人之神而託聖人之體是以  
八采重瞳勛華之容龍顏馬目軒皤之狀形  
表之異也比干之心七竅列角伯約之膽其  
大若拳此心器之殊也是知聖人定分每絕  
常區非惟道革群生乃亦形超萬有凡聖均

體所未敢安問曰子云聖人之形必異於凡者敢問陽貨類仲尼項籍似大舜舜項孔陽智革形同其故何耶荅曰珉似玉而非玉雞類鳳而非鳳物誠有之人故宜爾項陽貌似而非實似心器不均雖貌無益問曰凡聖之殊形器不一可也員極理無有二而丘且殊姿湯文異狀神不侔色於此益明矣荅曰聖同於心器形不必同也猶馬殊毛而齊逸玉異色而均美是以晉棘荆和等價連城驂騮

盜驪俱致千里問曰形神不二既聞之矣形  
謝神滅理固宜然敢問經云爲之宗廟以鬼  
饗之何謂也荅曰聖人之教然也所以弭孝  
子之心而厲偷薄之意神而明之此之謂矣  
問曰伯有被甲彭生豕見墳素著其事寧是  
設教而已邪荅曰妖怪茫茫或存或亡疆死  
者衆不皆爲鬼彭生伯有何獨能然乍爲人  
豕未必齊鄭之公子也問曰易稱故知鬼神  
之情狀與天地相似而不違又曰載鬼一車

其義云何荅曰有禽焉有獸焉飛走之別也  
有人焉有鬼焉幽明之別也人滅而爲鬼鬼  
滅而爲人則未之知也問曰知此神滅有何  
利用邪荅曰浮屠害政桑門蠹俗風驚霧起  
馳蕩不休吾哀其弊思拯其溺夫竭財以赴  
僧破產以趨佛而不恤親戚不憐窮匱者何  
良由厚我之情深濟物之意淺是以圭撮涉  
於貧友舛情動於顏色千鍾委於富僧歡意  
暢於容髮豈不以僧有多稔之期友無遺秉

之報務施闕於周急歸德必於在已又惑以  
茫昧之言懼以阿鼻之苦誘以虛誕之辭欣  
以堯率之樂故捨逢掖襲橫衣廢俎豆列餅  
鉢家家棄其親愛人人絕其嗣續致使兵挫  
於行間吏空於官府粟罄於墮遊貨殫於泥  
木所以姦宄弗勝頌聲尙擁惟此之故其流  
莫已其病無限若陶甄稟於自然森羅均於  
獨化忽焉自有悅爾而無來也不禦去也不  
追乘夫天理各安其性小人甘其壟畝君子

保其恬素耕而食食不可窮也蠶而衣衣不  
可盡也下有餘以奉其上上無爲以待其下  
可以全生可以匡國可以霸君用此道也

蓮僧設會論

夫脩營法事必有其理今世召請衆僧止設一會當由佛在世時常受人請以此擬像故也而佛昔在世佛與衆僧僧伽藍內本不自營其食具也至時持鉢往福衆生今之僧衆非唯持中者少乃有腆恣其腴厨膳豐豪者今有加請召並不得已而後來以滋腴之口進蔬藟之具延頸感頰固不能其旣非樂受不容設福非若在昔不得自營非資四輩身口無託者也此以求

福不其反乎篤而論之其義不爾何者出家之人本資行乞戒律曷然無許自立厨帳并畜淨人者也今旣取足寺內行乞事斷或有持鉢到門便呼爲僧徒鄙事下劣旣是衆所鄙恥莫復行乞悠悠後進求理者寡便謂乞食之業不可復行白淨王子轉輪之貴持鉢行詣以福施者豈不及千載之外凡庸沙門躬命僕豎自營口腹者乎今之請僧一會旣可髣像行乞行乞受請二事不殊若以今不復行乞又不請召則行



乞求法於此永冥此法既冥則僧非佛種佛種  
既離則三寶墜于地矣今之爲會者宜追想在  
昔四十九年佛率比丘入城乞食威儀舉止動  
目應心以此求道道其焉適若以此運心則爲  
會可矣

述僧中食論

人所以不得道者由於心神昏惑心神所以昏惑由於外物擾之擾之大者其事有三一則勞利榮名二則妖妍靡曼三則甘旨肥濃榮名雖目用於心要無晷刻之累妖妍靡曼方之已深甘旨肥濃爲累甚切萬事皆三者之枝葉耳聖人知不斷此三事求道無從可得不得不爲之立法使簡而易從也若直云三事惑本全宜禁絕而此三事是人情所甚惑念慮所難遣

雖有禁約之旨事難卒從譬於方舟濟河豈不欲直至彼岸河流既急會無直濟之理不得不從流却靡久而獲至非不願速事難故也禁此三事宜有其端何則食之於人不可頓息其於情性所累莫甚故推此晚食併置中前自中之後清虛無事因此無事念慮得簡在始未專在久自習於是束以八支紆以禁戒靡曼之欲無由得前榮名衆累稍隨事遣故云徃古諸佛過中不餐此蓋是遣累之筌蹄適道之捷徑而或

咸謂止於不食此乃迷於向方不知厥路者也

義

佛知不異衆生知義

佛者覺也覺者知也凡夫之與佛地立善知惡未始不同也但佛地所知者得善之正路凡夫所知者失善之邪路凡夫得正路之知與佛之知不異也正謂以所善非善故失正路耳故知凡夫之知與佛之知不異由於所知之事異知不異也凡夫之所知不謂所知非善在於求善而至於不善若積此求善之心會得歸善之路

或得路則至于佛也此衆生之爲佛性寔在其  
知性常傳也

六道相續作佛義

一切種智與五道六趣衆生共有受知之分無分異也問曰受知非知耶答曰非也問此以何爲體答曰相續不滅是也和續不滅所以能受知若今生陶練之功漸積則來果所識之理轉精轉精之知來應以至於佛而不斷不絕也若今生無明則來果所識轉闇轉闇之知亦來應以至於六趣也受知之具隨緣受知知之美惡不關此受知之具也問曰知非知旣聞命矣受

知受知自是相續不滅知自然因緣中來與此  
受知之具從理而相關荅曰有此相續不滅自  
然因果中來有因有果何得無美無惡乎



因緣義

凡含靈之性莫不樂生求生之路參差不一一爾流遷塗徑各異一念之間衆緣互起一因一果內有差忒好生之性萬品斯同自然所稟非由緣立固知樂生非因緣因緣非樂生也雖然復俱宅形骸而各是一物一念旣召衆緣衆緣各隨念起善惡二念誠有不同俱資外助事由一揆譬諸非水非土穀芽不生因緣性識其本旣具因果不惑雖則必然善惡獨起亦有愛礙

雖云獨起起便成因內因外緣寔由乎此也

沈隱侯集卷之十三

梁吳興沈約休文著

明閩漳張爕紹和纂

頌

千佛頌

道有偕適理無二歸照寂同是形相俱非千覺  
俯應通叩冥機七尊緬矣感謝先達旣過已滅  
未來無像一刹靡停三念齊往不常不住非今  
非曩賢劫雖遼倏焉如響栖林藉樹背室違家

前佛後佛迹罔隆窟或遊堅固或蔭龍華能達  
斯旨可類恒沙甦甦羣有均此妙極先晚參差  
各願隨力密跡弘道數終乃陟誓覩來運永傳  
今識

朝丹徒故宮頌

聖祖神傑堯蹤漢烈岳峻雄圖天張武節陽作  
旣升霸略將騁清渭走烽濁河獻警恃皓劍關  
憑深桂嶺彝章委闕禮樂沈河極壓傾構引溺  
危波盡物稱瑞窮靈委和玄精翼日丹羽巢阿

贊

高士贊

有序

余之所謂高士者悠悠皆是請試言之聖人蒞天下則賢人贊務高益臯陶是也自中智以下莫不有學以從政佐國安民者也易曰聖人之大寶曰位非學則不得也學所以行其志孝弟慈仁信義是也雖誦先王之典謨而不行其志聖人之大寶亦不可得也要須學行兼有然後取之悠悠之徒莫不攘袂而議進取怒目而爭

權利悅愚諂闇苟得忘廉若斯人者豈入國士之塗動衣冠之眚藉此而登高位未或有也贊曰

亦有哲人獨執高志避世避言不友不事恥從汗祿靡惑守餌心安藜藿口絕炮鼈取足落毛寧懷組織如金在沙顯然自異猶玉在泥涅而不緇身標遠迹名重前記有美高尚處知若無劣哉羣品事靜心驅苟能立志爭此匹夫進忘隕獲退守恬愉曰仁與義其徑不迂爲之則至

非物所拘宦成名立陟彼高衢



繡像題贊 有序

維齊永明四年歲次丙寅秋八月己未朔二日  
庚申第三皇孫所生陳夫人舍微宅理炳慧臨  
空結言寶位騰心淨覺敬因樂林寺主比丘尼  
釋寶願造繡無量壽尊像一軀乃爲讚曰

表相異儀傳形匪壹鏤玉圖光雕金寫質亦有  
淑人含芳上律絢發綺情幽摛寶術縹文內炳  
靈姿外溢水耀金沙栴羅瓊寶現符淨果來膺  
妙秋毓藻震闡騰華梵室有億斯年於萬茲日

彌勒贊

乘教本一法門不二鄰基累明功由積地耿耿  
長津遙遙遐轡道有常尊神無恒器脫誕王家  
來承寶位慧日晨開香雨宵墜藉感必從憑緣  
斯至曰我聖儲儀天作貳尙想龍柯瞻言思媚  
鐫石圖徽雕金寫秘望極齊工舉光等邃超矣  
福臻融然理備敬勒玄蹤式傳遐懿

銷聲贊

寂矣栖魂非海非樊若人焉往其理空存天標

已暖絕羽孤寒  
堯逢豈讓札  
值癸言

雪贊

火競乃上炎陰矯亦下潤  
獨有凝雨寒貞晚而  
無列排雲寧自高  
睎光本非恹委谷不辭深  
因  
巖豈知峻累貌雖同賞  
其心共誰振

銘

瑞石像銘

并序

夫靈應微遠無跡可追心路照通有感斯順我  
皇體神御極挹睿臨乾幽顯成袞無思不服若  
夫二儀叶德五精翼化下洞淵泉上達蒼昊天  
無息瑞地不降祥十住髮髯於林衡應真胗蠻  
於清夜素毫月舉騰光於梵室妙趾神行布武  
於椒殿至於事符細牒旣表禎圖無不雲霏霧  
委盈簡被策莫黑三距眇千齡而再現曷露淳

腹望鳳蓋而沾陞此皆舜日未書堯年罕降豈  
直朱鳥動色玄秬相趣而已哉嘉玉遠自北戎  
梁弱水而委質潤徹環奇曠世之所不覩白金  
近發東山剖幽巖而啓瑤傍被崖巖鴻靈之所  
未刊雖復素環之絕貺燭銀之瑤寶方斯蔑如  
也若夫金石具剛非游泳之質自非霈德潛行  
感極迴靈豈變堅沈之體顯輕浮之相維永明  
七年某月爰有祥石眇發天津浮海因潮翻流  
迴至表異浙河獻奇禁圃瓊瑜等潤精金比色

上眷幽關之易啓咨玄應之無方雖拊事寂  
寥而因心咫尺愛其貞恒之性嘉其可久之姿  
莫若圖妙像於檀香寫遺影於祇樹乃詔名工  
是鐫是琢靈相瑞華煥同神造至於雕削之餘  
遺刊委斲方圓小大觸水斯沈駐罕停蹕親加  
臨試良由法身是託不溺沉弱之淵剖析旣離  
方須浮金之水至矣哉禎符若斯之妙也敢銘  
寶呪永福天人其詞曰

遙哉上覺曠矣神功四禪無像三達皆空表靈

降世演露開蒙惟聖仁宇寶化潛融道非迹應  
事以感通沈精浮質遠自河葱悠悠亘水眇眇  
因風泛彼遼碣瑞我國東有符皇德乃眷宸衷  
永言驚室栖誠梵宮載雕載範寫好摛工藉茲  
妙力祚闡業隆冕旒南面比壽華嵩

光宅寺刹下銘

并序

光宅寺蓋上帝之故居行宮之舊兆揚州丹陽  
郡秣陵縣某鄉某里之地自去茲邠毫來儀京  
輔拓宇東第咫尺武城闔聖心留愛閑素遷負南  
郭義等去鄴事均徙鎬及尅濟橫流膺斯寶運  
命帝闢以廣闢卽太微而爲宇旣等漢高流連  
於豐沛亦同光武眷戀於南陽思所以永流聖  
迹垂之不朽令事與須彌等固理與天地無窮  
莫若光建寶塔式傳於後乃以大梁之天監六



年歲次星紀月旅黃鍾閏十月二十三日戊寅  
仲冬之節也乃樹剝玄壤表峻蒼雲下洞淵泉  
仰迫星漢方當銷巨石於賢劫極未來於忍土  
若夫朱光所耀彤雲所臨非止天眷兼因地德  
皇帝乃啓扉闔闔造舟淮渙接神飈而動膠越  
浮梁而逕度芝蓋容與翠華葳蕤下輦停蹕躬  
展誠敬廣集四部揆景同蔬弘此廣因被之無  
外同由厥路俱至道場乃作銘曰

八維悠濶九服荒茫靈聖底止咸表厥祥壽丘

謖謖電繞樞光周原膺膺五緯入房自茲遐復  
在處弗亡安知若水寧辨窮桑自天攸縱於我  
惟皇卽基昔兆爲世舟航重檐累構迴剝高巖  
土爲淨國地卽金牀因斯太極溥被翱翔豈徒  
三界寧止十方濡足萬古援手百王一念斯荅  
萬壽無疆如日之久如天之長

彌陀佛銘

法身無象常住非形理空反應智滅爲靈窮寂  
震響大夜開冥耿哉遐壽非歲非齡物愛彫彩  
人榮寶飾事儉欲興情克累息至矣淵聖流仁  
動惻順彼世心成茲願力於惟淨土旣麗且莊  
琪路異色林沼焜煌靡胎靡娠化自餘方託生  
在焉紫帶青房眷言安養興言遐適報路雖長  
由心咫尺幽誠曷寄刊靈表跡髣髴尊儀圖金  
寫石遺沱玉沙乍來乍往玲瓏寶樹因風韻響

願遊彼國晨翹暮想七珍非羨三達斯仰

釋迦文佛像銘

積智成朗積因成業能仁爽感將吼妙法駐景  
上天降生右脇始出四門終超九劫眇求靈性  
曠追玄軫道雖有門跡無可狀物我兼謝心行  
同泯一去後心百非寧盡式資理悟悟以言陳  
言不自布出之者身有來必應如泥在鈞形酬  
響答且物且人應我以形而余朦瞶守茲大夜  
焉拔斯苦仰尋靈輅法言攸吐不有尊儀夢焉  
誰覩

栖禪精舍銘

有序

此寺征西蔡公所立昔厠番麾預班經創之始  
今重遊踐鑒舊興懷故爲此銘以傳芳迹

巖靈旅逸地遠栖禪蘭房葺蕙嶠霓架煙南瞻  
巫野北望淮天遙哉林澤曠矣江田空心觀寂  
慧和淳筌眷惟斯踐愴屬遐年游仁厠遠宅賞  
憑旃頒創神苑陪構靈椽瞻禁拓圃望鷺疏山  
製石調響栖理疑玄曠移羽旆耿別松泉委組  
東國化景西連巒隰夷改蓬籜粗遷重依漢遠

復逐旌懸往辭妙幄今承梵筵八翻海鶴九噪  
巖蟬珮華長掩懋迹空傳式籍雲拱敢告祥緣

連珠

連珠二首

臣聞烈風雖震不斷蔓草之根朽壤誠微遂實  
崇山之峭是以一夫不加威於赫怒千乘必致  
亡於巧笑

臣聞鳴籟受響非有志於要風涓流長邁寧厝  
心於歸海是以萬竅怒號不叩而咸應百川是  
納用卑而爲宰